

昭
代
典
則

昭代典則卷之五

賜進士太子少保刑部尚書晉江黃光昇編輯

吳郡陸翀之訂正

金陵周曰校刊行

太祖高皇帝

戊申洪武元年春正月乙亥我太祖高皇帝祀天地于南郊卽皇帝位定有天下之號曰大明建元洪武○追尊四代祖考

皇高祖考尊號曰玄皇帝廟號德祖妣曰玄皇后

皇曾祖考尊號曰恒皇帝廟號懿祖妣曰恒皇后

皇祖考尊號曰祐皇帝廟號熙祖妣曰祐皇后

皇考尊號曰淳皇帝廟號仁祖皇妣陳氏曰淳皇后立妃馬氏爲皇后世子標爲皇太子○大誥天下

詔曰朕惟中國之君自宋運既終天命真人於沙漠入中國爲天下主傳及子孫百有餘年今運亦終海內疆土豪傑分爭朕本淮右庶民荷上天眷顧祖宗之

靈遂乘逐鹿之秋致英賢於左右凡兩淮兩浙江東江西湖湘漢沔閩廣山東及西南諸郡蠻夷各處寇擾委命大將軍與諸將校奮揚威武已皆戡定民安田里今文武大臣百司衆庶合辭勸進尊朕爲皇帝以主黔黎勉徇輿情於吳二年正月初四日告祭天地于鍾山

之陽卽皇帝位于南郊定有天下之號曰大明以吳二

年爲洪武元年是日恭詣太廟追尊四代考妣爲皇帝皇后立大社大稷於京師以昭實立妃馬氏爲皇后長子標爲皇太子布告天下咸使聞知○劉基曰冬寒之極必有陽春激湍之下必有深潭大亂之後必有大治理則然也元德既衰九土糜沸鴟張狼顧之豪彌滿山澤萬姓喁喁無所籲告天乃命我

太祖皇帝肅將威武征伐不道於是捨宋撥秦掣趙拔燕不數載而天下遂歸一統者天命有在也

改宣徽院爲光祿寺○詔製太廟祭器

上曰今之不可爲古猶古之不可爲今禮順人情可以義起所貴斟酌得宜必有損益近世泥古好用古籩豆

之屬以祭其先生既不用死而用之似亦無謂孔子曰事死如事生事亡如事存其製宗廟器御皆如事生之儀於是造銀器以金塗之酒壺孟盤每事皆入朱漆盤益二百四十及揮拂枕簟篋笥檮慢浴室皆具

蒙古興化守將葉萬戶棄州遁者民李子成率衆詣湯和降和遣都指揮僉良輔往守之於是莆田等十三縣相繼皆降遂移師進攻延平

丁丑大宴羣臣于奉天殿

宴罷因諭之曰朕以布衣有天下實由天命當羣雄初一起所在剽掠生民惶惶不保朝夕朕見其所爲非道心常不然旣而與諸將渡江駐兵太平深思愛民安天下

之道自是十有餘年收攬英雄征伐四方克頽諸將輔佐之功尊居天位念天下之廣生民之衆萬幾方殷朕中夜寢不安枕憂懸于心御史中丞劉基對曰往者四方未定勞煩聖慮今四海一家宜少紓其憂帝曰堯舜聖人處無爲之世尚猶憂之矧德匪唐虞治非雍熙天下之民方脫創殘其得無憂乎夫處天下者當以天下爲憂且以一身與天下國家言之一身小也所行不謹或致顛蹶所養不謹或生疢疾况天下國家之重豈可頃刻而忘警畏耶○上諭中書省臣曰成周之臣治掌於家宰教掌於司徒禮掌於宗伯政掌於司馬刑掌於

司寇工掌於司空故天子總六官六官總百執事大小相維各有攸屬是以事益簡而政不紊故治泰用商鞅變更古制法如牛毛累其民甚而民不從故亂卿等任居宰輔宜振舉大綱以率百寮替朕爲治○上諭參臣曰吾觀史傳所載歷代君臣或聖明之君樂聞忠讐而臣下循默奸諂不盡其誠者有之或臣下不欺能抗言直諫而君上昏愚驕暴飾非拒諫者有之臣不諫君是不能盡臣職君不受諫是不能盡君道臣有不幸言不見聽而反受其責是雖得罪於昏君然有功於社稷人民也若君上樂於聽諫而臣善於進諫則政事豈有不善天下豈有不治乃知明良相逢古今所難○上又諭參

臣曰忠臣愛君謙言爲國益愛君者有過必諫諫而不
切非忠也爲國者遇事必言言而不直者亦非忠也比
來朕每發言百官但唯諾而已其間豈無是非得失而
無有直言者雖有不善無由以聞自今宜盡忠謙以匡
朕不逮若徒唯唯非人臣事君之義也

戊寅帝自舊內遷新宮○以李善長等兼東宮官

初御史中丞劉基學士陶安言於帝曰昔聞中書及
都督府議倣元舊制設中書令欲奏以太子爲之
帝曰取法於古必擇其善者而從之苟惟不善而一槩
是從將欲望治譬猶登高岡而却步渡長江而迴擗豈
能達哉元氏胡人事不師古設官不以任賢惟類是與

名不足以副實行不足以服衆豈可取法且吾子年未長學未充更事未多所宜尊禮師傳講習經傳博古通今識達機宜他日軍國重務皆令啓聞何必倣彼作中書令乎禮部尚書陶凱請選人專任東宮官屬上曰古者官不必備惟賢是用朕以廷臣有才望勲德者兼東宮官非無謂也嘗慮廷臣與東宮官屬有不相能遂成嫌隙或生奸謀離間骨肉若江充之事可謂明鑒朕今立法令臺省等官兼東宮官贊輔之父子一体君臣一心庶無相構之患也乃命詹同等取東宮官制觀之謂同等曰朕今立東宮官取廷臣勲德老成者兼其職老成舊人動有典則若新進之賢者亦選擇參用夫舉

賢任才立國之本崇德尚齒尊賢之道輔導得賢人各盡職故連抱之木必以授大匠萬金之璧不以付拙工同對曰陛下立法垂憲之意實深遠矣於是以李善長等皆兼東宮官仍諭善長等曰朕於東宮官屬不別設府僚而以卿等兼之者蓋軍旅未息朕若有事於外必畱太子監國若設府僚卿等任內事當啓聞太子或有聽斷不明而與卿等意見不合卿等必謂府僚導之嫌隙將由是而生朕所以特置賓客諭德等官以輔成太子德性且選名儒爲之賓友督周公教成王告以克詰戎兵召公教康王告以張皇六師此居安慮危不忘武備蓋繼世之君生長富貴狃於安逸軍務之事多忽而

不務一有緩急罔知所措二公所言不可忘也

改中書省官制○定尚寶司官制

初設左右相國今改左右丞相各一人左右丞各一人參知政事二人其屬左右司郎中各一人員外郎各一人都事各一人中書舍人二十人

初設符璽郎今改爲尚寶司卿一人少卿一人司丞三人

人職在禁廷守寶璽符牌印章而辨其所用有事請於內旣事奉而藏之凡寶十四曰奉天之寶以鎮萬國祀天地曰皇帝之寶以冊封賜券曰皇帝信寶以徵召軍天子信寶以調發蕃兵曰制誥之寶以識誥命曰勅命

之寶以識勅命曰廣運之寶以識黃選勘籍曰御前之寶以進御座從車駕曰皇帝尊親之寶以答賜宗人曰敬天勤民之寶以訓迪有司凡扈守侍衛令牌之號六曰申木火土金水以警夜巡金牌之號伍曰仁義禮智信以嚴守衛凡半字銅符之號四曰承東西北巡者左半守者右半合契而從事焉凡銅牌之號一曰勇以稽直卒凡牙牌之號五曰勲親文武樂以察朝參凡祭牌之號三曰陪供執以謹祀事凡雙魚銅牌之號二曰嚴以肅直衛曰善以絜祀壇凡符驗之號五曰馬水達通信以給傳郵通制命

諭省府大臣戒驕盈保富貴

諭曰爾諸大臣既受封爵進職位可謂尊顯矣當同心輔國以享祿位朕常思古之君臣居安不忘警戒盈滿常懼驕縱兢兢業業日慎一日故能始終相保不失富貴大抵開基創業之主待功臣非不欲始終盡善如韓信彭越自不能保全其功深可惜哉至承平之後舊臣多有獲罪者究其所以蓋其事主之心日驕富貴之志日淫以致于敗古人致欹器於座側以戒其驕盈耳汝等宜戒慎之又謂都督同知康茂才等曰汝等今成大功豈汝一人之能哉非軍士同心効力曷能致此切不可挾功驕恣輕忽下人若此則鮮有不敗者朕故吐心拳拳爲爾等言之古之人主待其臣下往往以權術爲

馭不以至誠相感易生猜疑故久而生變今吾以直言告汝常相警戒非止在於汝身汝又當以朕意訓汝子孫則可與國同其長久矣時皇太子侍側上皆謂之曰太子年幼未歷世故朕嘗以此意誨之使他日汝子成立與吾兒共享太平常如今日則子子孫孫無有窮也羣臣皆拜謝而退○上御東閣御史中丞章溢學士陶安等侍因論前代興亡之事上曰喪亂之源由於驕佚大抵居高位者易驕處佚樂者易侈驕則善言不入而過不聞侈則善道不立而行不顧如此者未有不亡今日聞卿等論此深有警予心古者今之鑑豈不信與○上朝罷從容謂御史中丞劉基章溢曰朕起義淮右以

有天下戰陣之際橫罹鋒鏑者多常惻然于懷今民脫
喪亂猶出膏火之中非寬恤以惠養之無以盡生息之
道基對曰自元氏法度縱弛上下相蒙遂至於亂今當
維新之治非振以法令不可上曰不然夫經喪亂之民
思治安猶飢渴之望飲食則殘苦之餘休養生息猶恐
未蘇若更歐以法令譬以藥療疾而加之以鳩將欲救
之乃反害之且爲政非空言要必使民受實恩若徒事
其名而無其實民亦何所賴焉溢頓首曰陛下深知民
隱天下蒼生之福也○上謂宰臣曰朕每燕居思天下
之事未嘗一日自安蓋治天下猶治絲一絲不理則衆
緒棼亂故凡遇事必精思而後行惟恐不當致生奸弊

以殃吾民以此不敢頃刻安逸至於刑法尤所關心然此非一人所能獨理獄等皆湏究心庶幾人無冤抑刑獄清省漢宣帝言獄者所以禁暴止奸養育羣生甚得用法之意卿等宜体之毋忽也○上與儒臣論學術翰林學士陶安對曰正道之不明邪說害之也上曰邪說之害道猶美味之悅口美色之眩目人鮮不爲所惑自非有豪傑之見不能決去之也戰國之時縱橫捭闔之徒肆其邪說游說諸侯當時諸侯急於利者多從其說徃徃事未就而國隨以亡此誠何益夫邪說不去則正道不興天下焉得而治安曰陛下所言深探其本上曰仁義治天下之本也賈生論秦之亡不行仁義之道夫

秦襲戰國之弊又安得知此

置中山衛指揮使司以周立爲指揮使○置濟寧左右二衛○命道士周原德徃登萊州諭祭海神○諭天下來朝府州縣官

天下來朝府州縣官陞辭上諭之曰天下初定百姓財力俱困譬猶初飛之鳥不可拔其羽新植之木不可搖其根要在安養生息之而已惟廉者能約己而利人者必腋人而厚己况人有才敏者或尼於私善柔者或昧於欲此皆不廉致之也爾等當深戒之

甲申詔遣周鑄等一百六十四人往浙西覈實田畝上謂中書省臣曰兵革之餘郡縣版籍多亡田賦之制不能

無增損。征歛失中，則百姓咨怨。今欲經理以清其源，無使過制以病吾民。夫善政在於養民，養民在於寬賦。今遣周鑄等往諸府縣覈實田畝，定其賦稅。此外無令有所妄擾。復諭鑄等曰：爾經理第以實聞，無隱。前弊妄有增損，曲徇私情，以病吾民，否則國有常憲，各賜衣帽遣之。○上謂劉基曰：曩者羣雄角逐，生民於灰死，既多休養難復。今國勢已定，天下次第而平，思所以生息之道，何如？基對曰：生息之道，在於寬仁。帝曰：不施實惠，而槩言寬仁，亦無益耳。以朕觀之，寬仁必當阜民之財，而息民之力。不節用，則民財竭，不省役，則民力困。不明教化，則民不知禮義，不禁貪暴，則無以遂其生。如是

而曰寬仁是徒有其名而民不被其澤也。故養民者必植其本種樹者必培其根基頓首曰陛下盡心如此民其有不受惠者乎。傳曰以仁心行仁政實今日天下之幸也。

壬辰我師克建寧

征南將軍胡廷美

即廷瑞以避諱
御字改今名

副將軍何文輝率師至

建寧元守將同僉達里麻參政陳子琦集僚佐謀曰聞

大明軍驍勇自入杉關諸鎮望風瓦解其鋒不可當今

吾城中軍士不下萬餘儲蓄尚富可以拒守不可與戰彼攻吾城不克必將自逸吾因而乘之或可以得志衆皆曰然由是備禦甚堅廷美等進圍之數與挑戰達里

麻等固守不出。我師環其四門攻之益急。達里麻不能
支。夜潛至副將軍何文輝營納款。詰旦總管翟也先不
花亦率衆詣文輝降。廷美怒。二人不詣。已欲屠其城。文
輝止曰。吾與公同受命至此。爲安百姓耳。今城降。欲以
私忿殺人可乎。廷美遂止。乃整軍入。申嚴號令。毫髮無
所犯。執叅政陳子琦送京師。獲將士九千七百九十餘
人。馬二百七十三匹。銀一萬六千三百兩。糧九萬八千
六百四十石。命指揮費子賢領兵守之。

庚子。湯和、克延平、蒙古平章陳友定送京師伏誅。
和克延平蒙
先是上遣使招諭友定。友定大會諸將殺使者。置血酒
甕中。慷慨飲之。誓衆死守。至是我師隔水而陣。分一軍

渡水攻其西門。友定謀於衆曰：「彼兵方來，其氣勇銳難與爭鋒，不如持久以困之。伺間而動，必有可勝。」遂嚴飭軍校，巡城晝夜不少怠。諸將出戰，友定不許。數請不已，友定乃疑其部將蕭院判劉守仁有二心，卽收其兵柄，殺蕭院判。守仁知事急，來奔。士卒多踰城夜遁，自始圍凡十日。適城中軍器局失火，炮聲亂發，我軍疑其內叛，遂併力攻城。友定見勢窮蹙，乃與副樞謝英輔、參政文殊海牙訣曰：「大事已去，吾無以報國家，惟有死耳。」公等宜自勉。迺退於省堂，按劍仰藥飲之。達魯花赤白哈麻、具服北面泣拜，與謝英輔皆自縊死。賴正孫等夜開門出降。黎明，我師入城。友定氣未絕，遂昇之出水東門。

外值大雷雨復甦憊蹶送京師以唐鋒知府事

友定
清獻公

友定至京師

上詰之曰元綱不振海內土崩天命更革豈人力所能爲爾竊據偏方負固逆命害吾參軍殺吾使者陸梁弗服欲何爲哉友定對曰事敗身亡惟有死耳尚有何言遂誅之

是月彗星見于昴畢○二月壬寅朔中書省臣李善長等進郊社宗廟議

上勅禮官翰林院太常諸儒臣曰自昔聖帝明王之有天下莫嚴於祭祀故當有事內必致其誠敬外必備其儀文所以交神明也朕誕膺天命統一海宇首建郊社

宗廟以崇祀事顧草創之初典禮未備其將何以交神明致靈祝卿等宜酌古今之宜務在適中定議以聞至是善長等奏有國大祀曰圜丘曰方丘曰宗廟曰社稷各具沿革以進圜丘之說曰天子之禮莫大於祀天故有虞夏商皆郊天配祖其來尚矣周官大司樂冬至祀天於地上之圜丘大宗伯以禋祀祀昊天上帝孝經曰郊祀后稷以配天宗祀文王於明堂以配上帝皆所以重報本反始之事禮之見於遺經者可考也秦人燔書減學仍西戎之俗立四時以祀白青黃赤四帝漢高祖因之又增北畤兼祀黑帝至武帝有雍五畤之祠又有渭陽五帝之祠又有甘泉太乙之祠而昊天上帝之祭

則未嘗舉行至元帝時合祭天地光武祀太乙遵元始之制而先王之禮變易盡矣魏晉以來郊丘之說互有不同宗鄭玄者以爲天有六名歲凡九祭六天者北辰曜魄寶蒼帝威靈仰赤帝赤熛怒黃帝含樞紐白帝白招拒黑帝協光紀是也九祭者冬至祭昊天上帝於圜丘立春立夏季夏立秋立冬祭五帝於四郊王者各稟五帝之精而主天下謂之感生帝於夏正之月祭於南郊四月龍見而雩總祭五帝於南郊季秋大享於明堂是也宗王肅者則以天體惟一安得有六一歲二祭安得有九大抵多參二家之說行之而至唐爲尤詳武德貞觀間用六天之義永徽中從長孫無忌等議廢鄭玄

議用王肅說乾封中復從鄭玄議焉宋太祖乾德元年
冬至合祭天地于圜丘神宗元豐中罷合祭哲宗紹聖
徽宗政和間或分或合高宗南渡以後惟用合祭之禮
元初用其國俗拜天於日月山成宗大德六年建壇合
祭天地五方帝九年始立南郊專祀昊天上帝泰定中
又合祭然皆不親郊文宗至順以後親郊者凡四惟祀
昊天上帝今當遵古制分祭天地于南郊冬至則祀昊
天上帝於圜丘以大明夜明星太歲從祀方丘之說曰
按二代祭地之禮見於經傳者夏以五月商以六月周
以夏至日禮之於澤中方丘蓋王者事天明事地察故
冬至報天夏至報地所以順陰陽之義也祭天於南郊

之圜丘。祭地於北郊之方澤。所以順陰陽之位也。然先王親地。有社存焉。禮曰。享帝於郊。祀社於國。又曰。郊所以明天道。社所以明地道。又曰。郊社所以祀上帝。又曰。明郊社之禮。或以社對帝。則祭祀乃所以親地也。書曰。敢昭告于皇天后土。左氏曰。戴皇天。履后土。則古者亦命地。祗爲后土矣。曰。地祗曰后土。曰社。皆祭地也。此三代之正體。而釋經之正說。自鄭玄惑於緯書。而謂夏至於方丘之中。祭昆崙之祗。七月於泰圻之壇。祭神州之祗。析而二之後。世宗焉。一歲二祭。自漢武用祠官寬舒議。立后土祠於汾陰。唯上禮如祀天。而後世又宗之。於北郊之外。仍祠后土。元始間王莽奏罷甘泉泰畤。復長

安南北郊以正月上辛若丁。天子親合祠天地於南郊而後世又因之多合祭焉。由漢歷唐千餘年間祀北郊者惟魏文帝之太和周武帝之建德隋高祖之開皇唐元宗之開元四祭而已。宋元豐中議專祭北郊故正和中專祭者凡四。南渡以後則惟攝祀而已。元皇慶間議夏至專祭地未及施行今當以經爲正擬以今歲夏至日祀方丘以五嶽五鎮四海四瀆從祀宗廟之說曰傳云萬物本乎天人本乎祖故爲之宗廟以享祖考而致其報本之意也。德有厚薄故制有隆殺自天子至官師其制不同。周制天子七廟而商書伊尹曰七世之廟可以觀德則知天子七廟自古有之不獨周爲然也。若夫

太祖百世不遷三昭三穆以世次比至親盡而遷焉此有天下之常禮也若至周穆王時文王親盡當祧共王時武王親盡當祧以其有功當宗故皆別立一廟而謂之文世室武世室亦皆百世不遷漢高承秦之弊未嘗立七廟至太上皇崩始詔郡國立廟而皇祖以上無間焉惠帝詔有司立原廟又以沛宮爲高祖廟又以陵傍立寢園廟自後每帝輒立一廟不序昭穆景帝尊高帝爲太祖文帝爲太宗宣帝又尊武帝爲世宗皆世世不毀至元帝始罷郡國廟及寢園廟光武中興於洛陽立高廟祀高祖及文武宣元五帝天子親奉祠於長安故高廟祀成哀平三帝京兆尹侍祠又別立四親廟於南

陽春陵祀父南頓君祖鉅鹿都尉曾祖博林太守高祖
春秋陵節侯皆歲時郡縣侍祠至明帝遺詔藏主於光烈
皇后更衣別室後帝相承皆藏主於世祖文廟由是同
堂異室之制至於元莫之能改唐高祖追尊高曾祖考
立四廟於長安太宗議立七廟虛太祖之室玄宗創制
立九室祀八世文宗開成中禮官以景帝受封於庶高
祖太宗創業受命有功之主百代不遷親盡之主禮合
祧遷至禘祫則合食如常其後以敬文武三宗爲一代
故終唐之世常爲九世十一室宋至太祖追尊僖順翼
宣四祖每遇禘則以昭穆相對而虛東向之位神宗熙
寧中奉僖祖爲太廟始祖至徽宗時增太廟爲十室而

不祧者五宗。崇寧中主王肅說謂二祧在七世之外乃建九廟。高宗南渡祀九世至于寧宗始別建四祖殿而正太祖東向之位。元世祖中統三年初建宗廟于燕京以太祖居中爲不遷之祖至泰定中爲七世十室今擬四代各爲一廟廟皆南向以四時孟月及歲除則合祭于高廟。社稷之說曰周制少宗伯掌建國之神位右社稷左宗廟社稷之祀壇而不屋必受霜露風雨以達天地之氣凡起大事動大衆必先告于社而後出其禮可謂重矣。蓋古天子社以祭五土之祗稷以祭五穀之神其制在中門之外朝門之內尊而親之與先祖等人非土不立非穀不食以其同功均利以養人故祭社必及

稷所以爲天下祈福報功之道也。然天子有三社爲羣姓而立者大社，其自爲立者曰王社。又有所謂勝國之社，屋之不受天陽，國雖亡而存之，以重神也。後世天子之禮，惟立大社、大稷以祀之。社皆配以勾龍，稷皆配以周葉。漢因高祖除亡秦社稷，立宮大社、大稷，一歲各再祠。光武立大社稷于洛陽，在宗廟之右。春秋二仲月及臘，一歲三祀。唐因隋制，並建社稷于含光門之右。仲春秋二時戊日祭之。玄宗升社稷爲大祀，仍以四時致稷于和義門內少南。以春秋二仲月上戊日致祭。今宜祀以春秋二仲月上戊日，從之。

蒙古漳州總制陳馬兒以城降。

征南將軍湯和遣使傳檄至漳州元達魯花赤迭理迷實具服焚香北面再拜持斧砍印章引刀目劄而以總制陳馬兒以城降湯和命指揮李執中守之

癸卯詔湯和還明州造海舟漕運北往宣德命平章察
求忠爲征南將軍以叅政朱亮祖副之諸元帥由海道取廣東

上諭求忠等曰王者之師順天應人所以除暴亂解倒懸以慰民望朕昔平定武昌荆湘諸郡皆望風欵附常遇春克贛州南安嶺南數郡亦相繼來歸此無他師出以律人心悅服故也今兩廣之地遠在南方彼此割據

民困久矣定亂安民正在今日彼聞八閩不守湖湘已平中心震懾若先遣人宣布威德以招徠之必有歸欵迎降者可不勞師旅慎勿殺掠沮向化之心如其拒命舉兵臨之扼其險要絕其聲援未有不下者且廣東要地惟在廣州廣州既下則循海州郡可傳檄而定海南海北以次招徠畱兵鎮守仍與平章楊瓊等合兵取廣西用師方畧率用是道肅靖南服在此一舉

蒙古汀州路守將陳國珍及泉州郡縣皆降

征南將軍胡廷美遣建寧降將曹復疇招諭汀州及寧化連城等縣元汀州守將陳國珍遂納款泉州郡縣聞之皆相繼降附

丁未詔以大牢祀孔子于國學。仍遣使詣曲阜致祭。○禁
士民易姓氏爲胡名。及習胡語服胡衣者。是百有餘年之舊矣。○癸丑常遇春克東昌。及所屬茌平等縣皆降。○甲寅楊環遣千戶王廷取寶慶。遂下之。

楊環遣千戶王廷將兵取寶慶。先是戎師已克寶慶。旣而復爲故陳友諒遁。將周文貴所陷。至是廷進次郡陽。茱萸灘賊衆千餘據險拒戰。廷擊敗之。進至城下。周文貴遁去。遂下其城。留兵守之。

丁巳命都督同知康茂才率師赴濟南。從大將軍徐達北伐。○壬戌勅贛州衛指揮使陸仲興帥師會廖永忠征廣東。

上諭仲亨等曰近命平章楊瓊等由湖南取廣西平章
廖永忠等由福建取廣東今特命爾等率師由韶州直
擣德慶三方進師爲掎角之勢舉無不克廣東既下合
兵以取廣西先聲旣震勢如破竹但當撫輯生民毋縱
殺掠

命中書議役法

上以立國之初經營興作必資民力恐役及貧民乃命
中書省驗田出夫於是省臣奏議田一頃出丁夫一人
不及頃者以別田足之名曰均工夫直隸應天等十八
府州及江西饒州九江南康三府計田三十五萬七千
二百六十九頃出夫如田之數遇有興作於農隙用之

上諭中書省臣曰。民力有限。而徭役無窮。當忍節其事。
毋重困之。民力勞困。豈能獨安。自今凡有興作。不獲已
者。暫借其力。至於不及之務。浮汎之役。宜罷之。

丙寅徐達平樂安

初樂安俞勝納欵徐達禮而遣之。勝旣歸陽爲附順陰
實從元。達乃遣其郎中楊子進等回樂安。名爲造作軍
器徵糧草。實欲陰察其所以勝果拒命而叛。達等遂進
師攻之。師至濟陽。指揮劉寧獲勝僉卒二人。達斬之而
進。丙寅達等師至土河。距樂安五里。命軍士填壩以進。
明日俞勝部將朱鎮撫等報說勝已遁去。達等率師趨
樂安。營于城東南。其郎中張仲毅出降。樂安平。令指揮

華雲龍守之副將軍常遇春都督馮宗異追勝不及獲其將朱右丞而還既而有報元丞相也速平章忽林台等軍至達率兵出戰元兵敗走追奔八十餘里殺傷甚衆生擒樞密院判脫歡并軍士數百人獲馬三百匹詔定宗廟時享之禮

翰林學士陶安待制詹同等奏古者櫨祠烝嘗四時之祭三祭皆合享于祖廟惟春祭于各廟自漢而下廟皆同堂異室則又四時皆合祭矣今四廟時享亦宜倣近制合祭于第一廟庶適禮之中無煩瀆也上命春特祭餘三時合祭是日太常又進宗廟月朔薦新禮上覽畢謂羣臣曰宗廟之祀所以隆孝思也然祭之于後不若

養之于先朕今不及矣。嘗聞爲人子者願爲人兄其意謂兄侍膝下之日久於養之日多也。朕於子爲人弟親存而幼不能以養及長而富有天下則親沒矣。雖欲以天下養其可得乎。因悲嘆久之。命以月朔薦新儀物著之常典。俾子孫世承之。○陶安等奏古者天子五冕。祭天地宗廟社稷諸神各有所用詣製之。上曰五冕禮太繁。今祭天地宗廟則服袞冕社稷等祀則服通天冠絳紗袍餘不用。

諭侍臣審察讒佞

上御奉天門謂侍臣曰。凡人之言有忠諫者有讒佞者忠諫之言始若難聽然有益如藥石。讒佞之言始若易

聽然其貽患不可勝言。夫小人之爲讒佞也。其設心機巧漸漬而入始焉必以微事可信者言於人主以探其淺深。人主苟信之。彼他日復有言。必以爲其嘗言者可信。將不復審察讒佞。因得肆志而妨賢病國。無所不至。自古若此者甚多。而昏庸之君。卒莫之悟。由其言甘而不逆於耳故也。惟剛明者。審擇於是。非取信於公論。不偏信人之言。則讒言可杜矣。○上諭侍御史文原吉等曰。比來臺臣。久無諫諍。豈朝廷庶務皆盡善。抑朕不能聽受。故爾。嘿嘿乎。爾等以言爲職。所貴者忠言。日聞有益於天下國家。若君有過舉。而臣不言。是臣負君。臣能直言。而君不納。是君負臣。朕嘗思介之士。於萬乘之

尊其勢懸絕平居能言臨對之際或畏不能盡其詞或倉卒不能盡其意故常霽色以納之惟恐其不盡言也至於言無實者亦畧而不究蓋見秦漢以來季世末主讒短惡諫誅戮忠直人懷自保無肯爲言者積咎愈深遂至不救夫日月之行猶有薄食人之所爲安能無過惟能改過便可成德矣原吉對曰陛下此心卽大禹好聞善言成湯不吝改過之心也言而無實豈不之究尤見天地之量上曰有其實而人言之則當益勉於善無其實而人言之則當益戒於不善但務納其忠誠何庸究其差謬

命選國子監生周琦等十人侍太子讀書禁中○三月命

翰林儒臣修女戒

上謂學士朱升等曰治天下者修身爲本正家爲先正家之道始于謹夫婦后妃雖母儀天下然不可使預政事至于嬪嬪之屬不過備職事侍巾櫛若寵之太過則驕恣犯分上下失序觀歷代宮闈政由內出鮮有不爲禍亂者也夫內嬖惑人甚於鴉毒惟賢明之主能察之於未然其他未有不爲所惑者卿等爲纂修女戒及古賢后妃之事可爲法者使後世子孫知所持守

壬申我師克全州

先是平章楊璟遣左丞周德興叅政張彬率兵取全州至是元平章阿思蘭聞王師至率衆遁遁州民遂以城

降於是道州莫及遼寧遼州土官李文卿守藍山縣元帥黎茂陵等俱遣人請降

甲申徐達奏上所獲山東州縣卒馬糧鹽布絹總數

凡獲卒三萬二千餘人馬一萬六千餘匹糧五十九萬七千餘石鹽五萬三千餘引布絹八萬七百餘疋時近臣因進言山東舊有銀場可興舉者上曰銀場之弊我深知之利於官者少而損於民者多况今彌瘵之餘豈可以此重勞民力昔人有拔荼種桑民復其利者汝豈不知言者慙而退

蒙古江西分省廣東左丞何真遣使奉表迎降

何真東莞人嘗爲淡水場管勾元末兵亂領南盜賊盜

起真遂退而家居及亂兵據惠農真集義兵復之以功受惠州路通判時海南寇邵宗愚陷廣州真率衆擊走之元立江西分省廣東以真爲分省右司員外郎陞左丞遂據有廣東諸州郡至是聞湯和等平福建遣使由海道奉表于元會廖永忠率舟師自福州由海道赴廣東真使遇我師遂攷真表請降而遣人回報于真於是永忠遣人送其使及表詣京師上賜詔褒之

諭侍臣劉基兵事

上御奉天門與劉基論兵事上曰克敵在兵而制兵在將兵無節制則將不任將非其人則兵必亂是以兩陣之間決死成敗之際有精兵不如有良將基對曰臣

苟聖上厚恩得侍左右每觀妙筭初謂未必皆然及至
摧鋒破敵動若神明臣由是知任將在陛下將之勝不
若主之勝也然臣觀陛下常不拘古法而勝此其所難
也上曰兵者謀也因敵制勝豈必泥於古哉朕嘗親當
矢石觀戰陣之事開闢奇正頃刻變化猶風雲之無常
勢要在通其變耳亦何暇拘古法耶

斬州進竹簾却之

上謂中書省臣曰古者方物之貢惟服食器用故無耳
目之娛玩物之失今斬州所進竹簾固爲用物但未命
而來獻若受之恐天下聞風皆爭進奇巧則勞民傷財
自此始矣命却之仍令四方非朝廷所需毋得妄有所

獻

廖永忠師至廣東。何真率官屬見。遂破邵宗愚。誅之。廣州平。

廖永忠舟師至潮州。何真遣其都事劉克佐。詣軍門上其印章。并所部圖籍。永忠至東莞。何真自率官屬出見。贛州指揮陸仲亨。畧定英。德清。遠陽江。連州肇慶等郡縣。進攻德慶。元守將張鵬程驅衆棄城遁。仲亨等遂引兵會永忠于廣州。永忠師至廣州之龍潭。元將盧左丞遣鎮撫盧成納。欵得海舟五百餘艘。軍士二千九百餘人。馬三百匹。糧五千餘石。命指揮胡通守之。邵宗愚聞。王師入廣州。遣其黨羅元祥。詣軍門降。本以覘軍勢而

實無降意。永忠謂之曰：「欲降則來，毋虛言以相歎也。」宗愚遷延累日竟不至。永忠知其詐，乃下令往攻之。夜二鼓，發兵直抵其寨，詰旦破之。宗愚兄弟俱殘暴嗜殺，近境頗被其虐。嘗陷廣州，大肆侵掠，廣州民尤嫉之。及面縛入城，民往觀之，爭噬其面，遂與其徒皆棄市。新會縣土豪黃彬、河源縣曾文昌、汲州廖仁等復聚衆作亂，自稱元帥。永忠復捕誅之。南海縣人麥稟祖以麌麌盜毒殺人，又捕斬之。廣州既平，永忠遂進兵取廣西。

追封叅軍胡深爲縉雲郡伯。

制曰：「據忠効力允惟勲舊之臣，崇德報功宜厚追封之。典表幽光於既往，昭大節於無窮。爰考彝章，用加寵數。」

故叅軍胡濬，奇姿素稟，偉器夙成，文詞克著於英華，武事燕通於韜畧。朕創業江左，嘗駐師金華，乃得賢才以資任用，首居省幕，繼擢叅軍，外則贊畫鴻鈞，內則周旋帷幄，恪恭乃職，廉潔有聲。重念括蒼之城，近接閩海之地，寇多侵擾，民弗寧居。俾率義師，鎮茲封域，每有保釐之助，卽無東顧之憂。柰何兵逼寇區，倉皇遇敵，然能身先士卒，慷慨以捐生。今茲七閏，悉入版圖，所獲渠魁已今震鼓，惜爾不及見此。俾朕哀痛致思，是用褒崇以旌勇烈，爾惟有嗣，朕念不忘。將世祿於厥家，庶永延于宗祀。歆服寵命，用慰幽冥，可追封爲縉雲郡伯。

丙戌揚環遣兵攻武岡州。蒙古守將曾權以城降。○丙申

鄧愈至南陽。蒙古參政王國寶副樞喬珍等以城降。○徐廷師至陳橋。左君弼竹昌迎降。

先是左君弼自唐州走安豐。及安豐破復走汴。梁元汴梁守將李克彝使守陳州。上嘗遣使諭以書曰：曩者兵連禍結。非一人之失。予勞師暑月。與足下從事。足下乃舍其親而奔異國。是皆輕信羣下之言。以至於此。雖悔何及。今足下奉異國之命。禦彼邊彊。與子接壤。若欲獻計。帥師侵境。其中輕重。自可量也。且予之國。乃足下父母之國。合淝之城。乃足下丘隴桑梓之鄉。寧不思乎。天下兵興。豪傑並起。豈惟乘時以取功名。亦欲保全父母妻子于亂世。足下以身爲質。而求安於人。旣已失策。

設使垂白之母，糟糠之妻，獨居寡處，各天一方。朝思暮望，以日爲歲。足下縱不以妻子爲念，何忍忘情於老親哉？功名富貴，可以再圖。生身之親，不可再得。足下能留意於是，幡然而來。予當盡棄前非，仍復待以故舊，則足下於天理人心，舉無不順矣。君弼得書，猶豫不能決。上乃歸其母于陳州，至是汴梁守將李克彝聞徐達至，召君弼謂曰：「公與南朝數接戰，熟其陣勢，今授公以兵，公前與戰，我從後乘之，何如？」君弼嘗感上歸其母，有降附意，因曰：「南朝軍鋒不可當。吾見其陣，輒膽落不能戰，故奔投至此。况徐相國善用兵，所向克捷。君弼安敢復受命，克穀無如之何。」乃夜驅軍民遁入河南。於是君

弼與竹昌等率所部兵詣達隣。達入汴城副將軍常遇春營于城外。尋命都督僉事陳德守汴梁。達等率步騎自中灤進取河南。

是月彗星出昴北

昴胡星也。彗除舊布新之象也。唐李淳風作晉天文志。成帝咸和七年十一月熒惑守昴。八年七月熒惑入昴。占曰胡王死。是月石勒果死。九年八月月又犯昴。十一月石虎廢。石弘幽殺之。淳風曰。是時雖二石僭號。而其彊弱常占于昴。不關太微紫宮也。自是精於天文者。首稱淳風。而其言如此。則昴爲胡星明矣。又言彊弱不關於太微紫宮。則胡人雖入中國。僭大號不得當正統也。

明矣。嗚呼。天人之際淵乎微哉。迨我聖祖以正月卽皇帝位。復中國之正統。彗星卽見于昴畢之間。是月又出于昴北。至七月而元遂亾。除腥羶之舊穢。布文明之新化。以開千萬年太平之瑞天也。○又按漢天文志云。昴畢間大街也。街北胡也。街南中國也。今彗出昴畢之間。蓋天厭胡人之混亂中國。故清而正之。而見其象於此天街之中。既而又出於昴北。則是旣定於華夷之限。又驅而除之於化外也。觀其後歲在庚戌。平定沙漠于應昌。歲在戊辰。蕩除胡種於捕魚兒海。天道何昭昭哉。

夏四月。命工畫古孝行及身所經歷艱難起家戰伐之事。爲圖以示子孫。

上謂侍臣曰。朕家本業農。祖父皆長者。世承忠厚。積善餘慶。以及於朕。今圖此者。使後世觀之。知王業艱難也。詹同頓首曰。陛下昭德垂訓。莫此爲切。上曰。富貴易驕。艱難易忽。父遠易忘。後世子孫生長深宮。惟見富貴。習於奢侈。不知祖宗積累之難。故示知之。以此朝夕覩觀。庶有所警也。

戊申徐達平河南。遂取嵩州。

大將軍徐達等率師自虎牢關進至河南塔兒灣。元將脫目帖木兒以兵五萬迎戰。列陣於洛水之北十五里。我軍旣成列。副將軍常遇春單騎突入其陣。敵發二十騎橫槊刺之。遇春發一矢。斃其先鋒。彼軍奪氣。達遂揮

衆乘之。俘斬無筭。脫目帖木兒將散失走陝州。達遂進營於河南城北門。李克彝復走陝西。於是河南行省平章梁王阿魯溫送欽軍門。河南平。達命左丞趙庸守之。指揮任亮招撫嵩州壬子副將軍常遇春率兵至嵩州。守將李知院迎降。甲寅入其城執其平章外兒等。分兵取未附諸山寨。

禁宦官預政典兵

上謂侍臣曰。吾見史傳所書漢唐末世皆爲宦官敗壞。不可極救。未嘗不爲之惋歎。此輩在人主之側。日見親信。小心勤勞。如呂強張承業之徒。豈得無之。但開國承家。小人勿用。聖人之深戒。其在宮禁。止可使之供灑掃。

給使令傳命令而已豈宜預政典兵漢唐之禮雖曰宦官之罪亦人主寵愛之使然向使宦官者不得與兵預政雖欲爲亂其可得乎

丁巳楊環克永州

先是平章楊環進擊永州元右丞鄧祖勝出兵南門拒戰環擊敗之祖勝收兵入城固守環盛兵圍之久不下乃命指揮胡海洋等於各門築壘困之復造浮橋於西江上練習軍士示以必克祖勝屢屈至是食盡力窮仰藥死參政張子賢等猶率衆拒守百户夏昇繩城詣環降因言祖勝死狀夜三鼓環督兵四面攻之胡海洋等踰城入于賢復率衆巷戰天明衆潰于賢與元帥鄧思

誠等就執并獲其全城士馬環調衡州衛指揮同知丁
玉守之於是永陽等州皆遣人降

蒙古守鞏縣孟夏寨叅政李成守福昌知院張興守鈞州
將哈喇魯守許州右丞謝平皆來降○辛酉常遇春下汝
州遂下郊縣○徐達遣都督同知馮宗異等取陝州蒙古
守將脫目帖木兒棄城遁以都督同知康茂才守之○癸
亥置山東行中書省調江西叅政汪廣洋爲山東叅政以
翰林學士陶安爲江西叅政

上謂安曰朕渡江之初卿首率父老見于軍門爲朕數
陳王業論當時之務深合朕心由是朝夕相近幕府軍
旅之事裨益良多繼入翰林益聞謹論今調汪廣洋爲

山東參政而江西乃上游都會可以代之者宜莫如卿。其爲我撫治之安。對曰臣以微陋叨蒙甄錄俾居左右。幸望過矣今復委以重任恐付托不效有負上恩。

帝曰躬擐甲冑決勝負於兩陣之間此武夫之事非儒生所能至若承流宣化綏輯一方之衆此儒者之事非武夫之所能也朕之用人因其所能不強其所不能卿才力宜膺是任故以授卿我豈私卿一人而不愛一六方乎安乃頓首受命

以陝西盧氏縣隸南陽府○甲子車駕發京師幸汴梁上遣使諭都督同知馮宗異曰若克潼關勿遽乘勝而西今大將軍方有事北方宜選將留鎮守關以遏其援

兵。爾且率師回汴梁。朕將躬往議之。是日。車駕發京。
師幸汴梁時言者皆謂君天下者宜居中土。汴梁宋故
都。勸帝往視之。且會大將軍謀取元都。

馮宗異入潼關。請益兵於徐達。達調僉事郭子興等守潼
關。與宗異俱還河南。

馮宗異進兵攻潼關。初蒙古李思齊。張良弼。聞王師取
河南。即駐兵潼關以拒。既而火焚良弼營。思齊乃移軍
退守葫蘆灘。遣其部將張德欽。穆薛飛。守關。及王師至
關。思齊棄轎重走鳳翔。良弼奔麟城丙寅。宗異遂入潼
關。引兵西至華州。蒙古守將望風奔潰。五月庚午。徐達
自河南進至陝州。馮宗異請益兵。守潼關。達調僉事郭

子興將慶陽衛指揮于光威武衛指揮金興旺守之丙子馮宗異還軍至陝州徐達與之俱還河南。

己卯廖永忠等克廣西梧州等州

征南將軍廖永忠叅政朱亮祖等兵至梧州元達魯花赤拜住率官吏父老迎降時元吏部尚書普顏帖木兒張翔以便宜行事入廣西行次藤州同永忠兵至募兵欲迎戰民無有應之者既而聞州守吳鏞出降乃率所部百餘人走鬱林亮祖勒兵追之普顏帖木兒戰死張翔赴水死亮祖駐兵於藤州於是潯容貴橫鬱林等州郡以次皆降

庚寅車駕至汴梁

辛卯常遇春馮宗異至行在謁見

上勞之曰大將軍

與將軍率師北征不踰年平齊魯下河洛亦甚勞矣遇

春頓首曰此陛下威德所至臣等奉遵成筭得效驅馳

臣等之幸也徐達尋自河南至見上

上勞之曰將軍

帥師征討勤勞于外古人所謂忠爾忘身國爾忘家誠

將軍之謂也朕聞河朔之民日夕望吾師至將軍宜與

諸將乘時進取而安輯之朕觀天道人事元都可不戰

而克大丈夫建功立業各有其時揆時之會不失事機

在將軍等勉之達等頓首謝既退

上復召問達今取

元都計將安出達對曰臣自平齊魯下河洛王保保遂

巡太原徒爲觀望今潼關又爲我有張良弼李思齊失

勢西竄元之聲援已絕臣等乘勢擣其孤城必然克之上據圖指示曰卿言固是然北土平曠利於騎戰不可無備宜選偏裨提精兵爲先鋒將軍督提水陸之師繼其後下山東之粟以給饋餉由秦趙趙轉臨清而北直擣元都彼外援不及內自驚潰可不戰而下達又曰臣慮進師之日恐其北奔將貽患於後必發師追之上曰元起朔方世祖始有中夏乘氣運之至理自當興彼氣運旣去理固當衰其成其敗俱係于天縱其北歸天命厭絕彼自漸盡不必窮兵追之但其出塞之後卽固守彊圍防其侵擾耳達受命而退

甲申蒙古海南海北道元帥羅福等遣使來降

時海南分府元帥陳乾富亦相繼歸附 上下詔諭意

令益堅乃心以寧吾民先是元旣訪使廬山海牙守雷州征南將軍廖永忠遣人以克廣州事 諭海牙海牙以爲詐殺使者至是聞廣州已下海牙畏南走交趾故羅福遂以城降

壬戌楊環朱亮祖等克靖江

楊環朱亮祖等合兵攻靖江克之執元平章也見吉尼其都事趙元隆陳瑜劉永錫廉訪司僉事帖木兒普化元帥几秃蠻萬戶董丑漢府判趙世傑皆自殺先是左丞周德興分兵據靖江險要以絕其聲援環旣克永州遂引兵抵靖江城下屯于北閥叅政張彬屯西閥亮祖

亦帥師自廣東來會屯于東門象鼻山下攻城越二旬不下環語諸將校曰彼所恃者西城濠水耳當先取開口關決其堤岸則破之必矣諸將曰諾明日遣指揮使丘廣引輕兵攻開口關殺其守堤兵決其堤濠水涸因築土堤至近與其城接以通士卒遂克其北門月城尋又克其北門水隘斬獲百人也兒吉尼有懼色復攻其西門不利我軍死敗者三百餘人相持凡兩閱月攻之益力也兒吉尼勢窮蹙其總制張榮與麾下裴觀以書繫矢射環營約降期以是夜來會既二鼓觀絕城出見環備言城中儲積空虛人無鬪志可立取之狀環乃給白皮帽百餘俾歸爲識約四鼓從寶賢門入至期環命指

揮使吳興寧等率衆登城而入也。兒吉尼聞變倉卒走。
追至城東伏波門執之。亮祖德興各以所部兵入城。惟
彬尚屯南關。彬始攻城爲守者所詬。嘗恚曰：「城破之日。
當悉屠之。」比克城，環懼其縱殺，下令曰：「殺人傷人及剽
掠者死。」彬乃止。衆心遂安。○廖永忠進師至南寧。元上
浪屯田千戶宋真執其守將平章咬住。叅政那海遣使
詣永忠降。永忠悉收諸司印章。命真守其城。送咬住等
赴京師。於是左江太平府土官黃英衍。右江田州府土
官岑伯顏等遣使齎印章詣楊環降。元平章阿思蘭初
自全州之敗。率其餘衆退保象州。廖永忠兵至梧州。遣
指揮耿元璧等討之。師至賓州境。思蘭復遣其部將等

左丞迎拒元壁等擊敗之思蘭窮迫乃遣其子僧保來納款至是自率所部詣永忠獻其銀印三銅印三十七金印五廣西志平楊璟等自靖江率師還京

陳友定故將金子隆臨將樂攻延平命平章李文忠率兵討之

陳友定既敗其將金子隆馮公保等糾合清流寧化散卒寇將樂勢甚猖獗守禦千戶宋國成嬰城固守至是賊黨日衆攻城益急國成以援兵不至棄城遁于子隆等遂臨將樂殺知縣馮源主簿蘇兼善乘勝寇延平攻四鶴門指揮羅德聚千戶李申擊却之復來攻官軍出陣于城南橋以禦之指揮蔡玉率衆奮斬大敗其衆追至

沙縣之青雲寨子隆等負險拒守達甯衛指揮使沐英
遣兵夾攻破之擒谷保上以子隆未平乃命平章李

文忠率兵討之

以邳州知縣李相知和州兼守禦事

相至和州以南鄉銅城墻肺廢日久墻下之田皆沃壤
而民不得耕東門石肺傾圮貫城河填塞皆為民病乃
吊其父老訓諭集衆修浚之度工計材俾父老之習事
者董其役未幾二肺皆成時其啟閘以禁旱澇墻堤周
迴二百餘里田得常稔貫城之河東西凡千餘步舟楫
便之民賴其利

詔江西行省叅政黃彬統兵領袁州招集諸山寨逋卒○

置刻期百戶所

初選卒伍中能疾行者二百人謂之刻期以通捷報至是立百戶所以張德成爲百戶領屬之

秋七月蒙古大都紅霧及墨氣起○勅諭新受北方守令
勒曰牧民之任當愛其民况新附之邦生民凋瘵不有
以安養之將復流離失望矣爾宜體朕意善撫循之毋
加擾害簡役省費以厚其生勸孝勤忠以厚其俗能如
朕言不但民受惠於汝汝亦獲循良之名矣上命中書
給賞以勵其廉耻○復徵天下賢才至京授以守令上
語中書省臣曰治國家以得賢才爲先賢者天下之望
也然布衣之士新於以政必有以養其廉耻然後可以

責其成功。洪範曰：旣富方穀，此古人之良法美意也。乃厚賜而遣之。○上謂中書省臣曰：中原兵難之後，老稚之孤貧者多有失所，宜遣人賑恤之。省臣以國用不足爲對。上曰：得天下者，得民心也。夫老者民之父母，民之子弟。恤其老，則天下之爲子者悅。恤其幼，則天下之爲父母者悅。天下之老幼咸悅矣，其心有不歸者寡焉。苟置其困窮而不之恤，民將慄然曰：惡在其爲我上也？故周窮乏者不患無餘財，惟患無是心。能推是心，何憂不足？今日之務，此最爲先，宜速行之。

都督同知康茂才，兵至河北安邑、夏縣皆降。○丙申，車駕發汴梁還京師。命右副將軍馮宗異留守。

上在汴梁復勅大將軍徐達等曰。將軍駐師河洛。羣聳蓄銳經營布置已見功績。今軍中士卒皆鼓勇思奮。況秋氣已近。糧餉粗足。乘機進取。維其時矣。宜調益都。徐州濟寧諸將各將精銳悉會東昌。以俟征進。辛卯上將發汴梁。大將軍徐達等自陳橋入辭。帝諭之曰。朕與卿等率衆渡江。誓除禍亂。以安天下。今士卒捨父母妻子。戰鬪於矢石之間。百死一生。父未休息。朕每念之。惕然於心。非得已也。中原之民。父爲羣雄所苦。死亡流離。徧於道路。天監在茲。朕不敢忘。故命爾等帥師北征。廓清中原。拯民艱苦。昔元起沙漠。其祖宗有德。天命入主中國。將及百年。今其子孫怠荒因恤。民艱天厭。棄

之君則有罪。民復何辜。前代革命之際。兵戈相加。視如仇讐。肆行屠戮。違天虐民。朕實不忍。爾諸將帥。當以爲戒。克城之日。無虜掠。毋焚蕩。毋妄殺人。必使市不易肆。民安其生。凡元之宗戚。皆善待之。庶幾上答天心。下慰人望。以成朕伐罪救民之志。有不恭命。必罰無赦。諸將皆感激拜辭而退。相謂曰。主上愛民如此。吾屬敢不敬承。丙申。車駕發汴梁。還京師。命右副將軍馮宗異留守。徐達遂檄都督同知張興祖。平章韓政。都督副使孫興祖。指揮高顯等。將益都濟寧。徐州之師。會于東昌。

丁酉。蒙古彬州守將左丰楊以城來降。○閏七月庚子。徐達等率師取河北。州縣。

時徐達遣右丞薛顯參政傅友德等取衛輝元守將平
章龍二棄城走彰德辛丑達等師至淇門鎮參政傅友
德以獲嘉縣尹胡仲信來見達命仲信從鎮撫王處仁
守衛輝癸卯徐達師至彰德元年章龍二復出走同知
陳某等詣軍門降以右丞楊思祖統和陽衛守之明日
龍二部將楊義卿以船八十艘來歸徐達等師至廣平
元平章周昱先棄城遁大將軍駐城中邯鄲縣尹都文
玉率耆老降己酉徐達等師次臨清遣人詣東昌趣都
督同知張興祖等以師來會又檄守樂安指揮華雲龍
將兵從征庚戌傅友德游騎獲元將李寶臣都事張處
仁遂以爲嚮導達因遣友德開道以通步騎都督副使

顧時浚聞以通舟師癸丑平章韓政都督副使孫興祖俱以師會臨清於是大將軍徐達率馬步舟師北上命韓政守東昌并鎮撫臨清達師至德州常遇春張興祖及指揮高顯毛讓程華等俱以師會達等師至長蘆元守將左僉院遁去達命指揮費子賢守之達遂徇青州下之遣人諭子賢分兵守青州達等師至直沽獲其海舟七艘作浮橋以濟師達又令常遇春張興祖各率舟師並河東西以進令步騎遵陸而前元丞相也速等捍禦海口望風奔遁元都大震

廣東何真卒官屬入朝詔授江西行省參政
上諭之曰天下分爭所謂豪傑有二易亂爲治者上也

保民達變識所歸者次也。負固偷安流毒生民身死不悔斯不足論矣。頃者師臨閩越，卿卽輸城來降，不煩一旅之力，使兵不血刃，民庶安堵，可謂識時達變者矣。眞叩頭謝曰：昔武王伐暴，救民諸族，不明而會者八百。今主上除亂以安天下，天命人歸四海，景從臣本蠻邦之人，始者逢亂，不過結聚鄉民爲保生之計，實無他志。今幸遇大明麗天，無幽不燭。臣愚豈敢上違天命？上曰：夫能不買禍於生民者必世享其澤。朕嘉卿忠誠，授江西行省參政，以表來歸之誠。古云：令名德之輿也。卿令名已著，尚懋脩厥德，以輔我國家。

平章李文忠破清流寧化諸山寨閩地悉平。○以張正常

爲真人去其天師之號

上謂羣臣曰。至尊惟天。豈有師也。以此爲號。褻瀆甚矣。遂命去其正一教主天師之稱。改天師印爲真人印。秩正二品。其僚佐曰贊教曰掌書。

漳州府通判王禕上疏。請忠厚寬大以法天道。減節科歛以順人心。上嘉納之。○壬戌白虹貫日。乙丑白虹復貫日。○丙寅大將軍徐達入通州城。蒙古主妥懽帖睦邇北遁。開平

大將軍徐達等。師至河西務。元平章俺普達采兒只進巴率兵迎敵。我師與戰大敗之。達采兒只進巴等遁去。達進兵至通州營于河東岸。常遇春營于河西岸。乙丑

達命衛吏田中爲通州判官攝州事括糧得四千一百石元國公五十八知院卜顏帖木兒等率衆出都城來禦遇春擊敗之擒卜顏帖木兒及副摠也先迭兒脫帖木兒獲馬四百匹船百餘艘國公五十八遁去丙寅達率諸將入通州城指揮華雲龍以兵來會是夜三鼓元主及其后妃太子開建德門往北走大將軍徐達命都督副使孫興祖督軍士脩築通州城

八月己巳詔以金陵爲南京大梁爲北京

詔曰朕惟建邦基以成大業興王之根本爲先居中夏而治四方立國之規模最重自趙宋末世夷狄主中國今百有餘載其運乃終羣雄分爭未有定于一者民遭

塗炭亦已極矣。朕以布衣當擾攘之際，拔身行伍，率將渡江，荷天地眷祐，祖宗積德，臣下宣忠，將士用命。西平陳友諒，東滅張士誠，南靖閩廣，北有中原，武功大定。混一之勢已成，十七年間，凡糧餉軍需，百物科徵，民無休息，而江右一方煩勞尤甚。遂收天下平寧之效。朕觀中原土壤，四方朝貢道里適均。父老之言，乃合朕志。然立國之規模固重，興王之根本不輕。其以金陵爲南京，大梁爲北京，朕以春秋往來巡狩，播告爾民，使知朕意。

庚午，大將軍徐達克元都，詔改爲北平府。

徐達命馬指揮守通州，進師取元都，至齊化門，命將填壕登城而入。達登齊化門樓，執其監國宗室淮至帖

木兒不花及太尉中書左丞相慶童平章迭兒必朱
賽因不花右丞相張康伯御史中丞滿州等戮之并獲
宣府鎮南威順諸王子六人及玉印二成宗玉璽一封
其府庫及圖籍寶物又封故宮殿門令指揮張煥以兵
千餘人守之宮人妃主令其宦寺護視號令士卒無侵
暴人民皆按堵明日順德守將吉右丞胡叅政鄭叅政
皆自西山來降武德衛軍校獲前樂安逃將俞勝及南
叅政張郎中等達遣指揮鄧悍赴京獻捷仍命右丞薛
顯叅政傅友德平章曹良臣都督副使顧時將兵偵邏
古北諸隘口○元自太祖奇渥溫鐵木真於宋寧宗開
禧二年僭號於兀難河之原國語稱成吉思皇帝傳子

窩闈台於宋理宗端平元年滅金景定元年忽必烈即位是爲世祖至元十三年取宋十六年混一天下自太祖僭號至順帝丁未凡十三主一百六十三年自世祖取宋至順帝丁未凡九主八十九年按夷狄爲中國主始於劉淵繼以五胡爲南北朝爲遼金主至順帝北去前後凡一千六十餘年然前此胡主不過竊據一方雖南北平稱而中華之主猶在未有若胡元之時併海內而通屬於夷者蓋至此而冠履倒置極矣我

太祖一掃而肅清之使中原之地千有餘年沒於腥羶之中者拯而出之以復見天日真再造天地之功也

壬申詔中書省及臺部集耆儒議便民事宜

上謂中書省臣曰近京師火四方水旱相仍朕夙夜不遑寧處豈刑罰失中武事未息徭役屢興賦斂不時以致陰陽乖戾而然耶朕與卿等同國休戚宜輔朕修省以消天譴參政傅璡等對曰古人有言天心仁愛人君則必出災異以謳告之使知懼自省人君遇災而能驚懼則天變可弭今陛下修德省愆憂形於色居高聰卑天寔鑒之顧臣等待罪宰輔有乖調燮貽憂聖衷咎在臣等帝曰君臣一體苟知驚懼天心可回卿等其盡心力以匡朕不逮於是詔中書省及臺部集耆儒講諫便民事宜可消天變者○上謂侍臣宋濂等曰自古聖哲之君知天下之難保也故遠聲色去奢靡以圖天下

之安是以天命眷顧久而不厭後世中才之主當天下無事侈心縱欲鮮克有終至如秦始皇漢武帝好尚神仙以求長生疲精勞神卒無所得使移此以圖治天下安有不理以朕觀之人君能清心寡欲勤於政事不作無益以害有益使民安田里足衣食熙熙皞皞而不自知此卽神仙也功業垂於簡策聲名流於後世此卽長主不朽也夫恍惚之事難憑幽怪之說易惑在謹其所好尚耳朕常夙夜兢業以圖天下之安其敢游心於此濂對曰陛下斯言足以祛千古之惑也

始置六部官統於中書省○革司農大理二司

先是中書省惟設四部掌錢穀禮儀刑名營造之務

上乃命李善長等議建六部以分理庶務至是乃定置
吏戶禮兵刑工六部部設尚書侍郎中員外主事以
滕毅爲吏部尚書樊曾璞爲侍郎前司農卿楊思義爲
戶部尚書少卿劉誠爲侍郎錢用任爲禮部尚書世家
寶爲侍郎陳亮爲兵部尚書朱珍爲侍郎周祐爲刑部
尚書盛京輔爲侍郎張仁爲工部尚書張文爲侍郎
上御奉天殿六部官入見 上諭之曰朕肇基江左軍
務方殷所以官制未備今以卿等分任六部國家之事
總之者中書分理者六部至爲要職凡諸政務須屬心
爲朕經理或有乖謬則貽患於天下不可不慎。
改太中大夫司天監復置回回爲司天監○御史中丞劉

卷之三

三

基致仕

初上以北巡也。命丞相李善長及基等留守京師。且語基督察奸惡。以肅釐穀雖內府之事。亦宜糾舉。基素剛嚴。凡中書僚吏有犯。卽捕治之。宦者監工匠不肅。基啓皇太子捕寘諸法人。皆側足畏基。會中書都事李彬一奸事覺。彬素附善長。竊弄福善長。託基緩其獄。基不允。遣馳奏。請誅彬。帝可其奏。時大旱。善長等方議禱于神而誅彬之報適至。善長曰。今欲禱雨。可殺人乎。基怒曰。殺李彬。天必雨。遂斬彬。善長叱之。及帝還。怨基者多訴於帝前。善長亦言基專恣語頗切。帝皆不聽。會基有妻喪。因請告歸。許之。

大將軍徐達命指揮華雲龍經理故元都新築城垣。
己卯大赦天下○癸未命大將軍徐達副將軍常遇春帥
師取山西。

癸未詔大將軍徐達改飛熊衛爲大興左衛淮安衛爲
大興右衛樂安衛爲燕山左衛濟寧衛爲燕山右衛青
州衛爲永清左衛徐州五所爲永清右衛帝以元都
既克遂命大將軍徐達副將軍常遇春帥師取山西別
留兵三萬人分隸六衛令都督副使孫興祖僉事華雲
龍守之詔以御史大夫湯和爲偏將軍與平章楊璟俱
從大將軍徐達征山西先是湯和自福建還慶元
上命造海舟運糧往直沽俟大將軍征發是歲海多颶

風不可行，乃詔和以糧儲之鎮江還京師。至是命從西征。

戊子大將軍徐達遣右丞薛顯參政傅友德將兵略大同。

○命指揮葉國珍計度北平南城

議金時舊基也

○甲午命右副

將軍馮宗異率兵從大將軍徐達取山西。○九月戊戌改故元都安貞門爲安定門建德門爲德勝門。○癸亥下詔

求賢。

詔曰朕惟天下之廣固非一人所能治必得天下之賢共理之向以干戈擾攘疆宇彼此致賢養民之道未之深講雖賴一時輔佐匡定大業然懷才抱德之士尚多隱於岩穴豈有司之失於敦勸歟朝廷之疏於禮待歟

抑朕寡德不足以致賢歟。將在位者壅蔽。使賢者不上達歟不然。賢士大夫幼學壯行。思欲堯舜君民者。豈固沒世而已哉。今天下甫定。願與諸儒講明治道。啓沃朕心。以臻至治。岩穴之士。有能以賢輔我。以德濟民者。有司禮遣之。朕將擢用焉。○上謂中書省臣曰。任人之道。因材而授職。譬如良工之于木。小大曲直。各當其用。則無棄材。夫人亦然。有大器者。或乏小能。或有小能。不足以當大事。用之者。在審察其宜耳。驛驅之材。能歷險置遠。若使櫻兔不如韓盧。鉛刀之割。能破朽腐。若解全牛。必資利刃。故國家用人。當各因其材。不可一律也。不然。則人材不得盡其用。而朝廷有乏人之患矣。○上手詔

中書省臣曰昨有張沖上書言時事其所言有可取者二一謂在廷之臣令各言朝廷得失庶上有所據而用其所長一謂中書省令各衙門正官各言得失每月用三人言言貴簡當選其練達剗切不避忌諱者量加擢用以養忠直之氣此甚可取也夫聞得失則知利病知利病則生民蒙其福聽忠直則正人多正人多則朝廷清明矣自古治世之君皆由是道若秦二世隋煬帝所以亡者坐不用此耳○有御史上言陶安隱微之過上曰朕素知安安豈有此且爾何由知之對曰聞之於道路上曰御史但聽道路之言以毀譽人以此爲盡職乎命中書省黜之

甲子大將軍徐達副將軍常遇春叅政傅友德等率兵北平取未下州郡○都督張興祖下永北○乙丑副將軍常遇春下保定府以指揮李傑守之丁卯下中山府以指揮董勳守之遂帥師趣真定○十月戊辰大將軍徐達下河間府以廣武衛鎮撫劉聚守之○己巳副將軍馮宗異偏將軍湯和下懷慶以指揮紀斌守之○壬申馮宗異湯和取澤州丁丑取潞州○戊寅以元都平詔天下○大將軍徐達克雄州以徐州衛鎮撫程信守之○命毀蒙古水晶

宮刻漏

司天監進元主所製水晶宮刻漏備極機巧中設二木偶人能按時自擊鉦鼓上覽之謂侍臣曰廢萬幾之務

而用心於此所謂作無益害有益也。使移此心以治天下。豈至亡滅命左右碎之。

丁酉定正旦朝會儀○十一月己亥定諸祀典

中書及禮部定奏天子親祀圜丘方丘宗廟社稷若京師三皇孔子風雲雷雨聖帝明王忠臣烈士先賢等祀則遣官祭祀郡縣宜立社稷有司春秋致祭庶人祭里社土谷之神及祖父母父母并得祀竈載諸祀典餘不當祀者禁止○上諭群臣曰凡祭享之禮載牲致帛交於神明費出已帑神必歆之如庶人片紙辦香皆可格神不以菲薄而弗享也所得之物皆已力所致也若國家倉廩府庫所積乃生民膏脂以此充實神庭徼福私

鬼神可欺乎惟爲民禱祈如水旱疾疫師旅之類可也
命告謀反不實者抵罪有司著爲令○諭宿衛武臣

上朝罷召宿衛武臣諭之曰朕與爾等起布衣歷戰陣
十五六年乃得成功朕今爲天子卿等亦任顯榮居富
貴非偶然也朕提孤軍應敵危亦甚矣然每出師必戒
將士毋妄殺毋焚民居此心簡在上帝故有今日卿等
亦思曩時在民間視元之將帥輕裘肥馬氣燄赫然何
敢望之然彼之君民不思祖宗創業之難驕淫奢侈但
顧一身逸樂不恤生民疾苦一旦天更其運非特不能
保其富貴遂致喪身滅名今曆數在朕朕何敢驕怠常
恐政事廢缺日慎一日自非犒賞將士宴百官享外使

未嘗設宴爲樂爾等亦須勤身守法勿忘貧窶之時勿爲驕奢淫佚之事則身常榮而家常裕矣

遣文原吉詹同魏觀等分行天下訪求賢才

上諭之曰天生人才必爲世用然人之材器有不同明銳者質或輕剽敦厚者性或迂緩辯給者行或不遠沉默者德或有餘卿等宜加精鑒原吉等曰陛下昭德四海正賢俊丕應之日臣等敢有不盡其心上曰人材不絕於世朕非患天下無賢患知人之難耳苟所舉非所用爲害甚大卿等慎之

辛丑建大本堂

命取古今圖籍充其中延四方各儒以教太子諸王分

班夜育。仍選才俊之士。伴讀。上旣立皇太子以定大
本。戒之曰。天子之子。與公卿士庶人之子不同。公卿士
庶人之子。係一家盛衰。天子之子。係天下安危。爾承主
器之重。將有天下之責也。公卿士庶人不能修身齊家。
取敗止於一身。一家若天子不能正身修德。其敢豈一
身一家之比。將宗廟社稷不保。天下生民受殃。可不懼
哉。○上嘗退朝還宮。皇太子諸王侍。上指宮中隙地。謂
之曰。此非不可起亭館臺榭爲遊觀之所。今但令內史
種蔬。誠不忍傷民之財。勞民之力耳。昔商紂崇飾宮室。
不惜人民。天下怨之。身死國亡。漢文帝欲作露臺。而惜
百金之費。當時民安國富。夫奢儉不同治亂懸絕。爾等

當記吾言。常存警戒。○上諭皇太子曰。自古帝王以天下爲憂者。惟創業之艱。中興之主及守成賢君能之。其尋常之君。不以天下爲憂。反以天下爲樂。國亡自此而始。何也。帝王得國之初。天必授於有德者。然頻屢憂患。而後得之。其得之也難。故其憂之也深。若守成繼治之君。常存敬畏。以祖宗憂天下之心爲心。則永受天命。苟生怠慢。危亡必至。可不畏哉。○上御文樓。太子侍側。因問近來儒臣講說經史何事。對曰。昨講漢書七國叛漢事。遂問此曲直孰在。對曰。曲在七國。上曰。此講官一偏之說。且言景帝爲太子時。常投博局殺吳王。世子以激其怒。反爲帝。又聽晁錯之說。輕意黜削諸侯土地。七

國之變實由於此若爲諸子講此則當言藩王必上尊
天子下撫百姓爲國家藩輔以無撓天下公法如此則
爲太子者知敦睦九族隆親親之恩爲諸子者知夾輔
王室以盡君臣之義○上召東宮官屬及王府官屬諭
之曰輔導之臣猶法度之器必先正已而後正人蓋德
義者正人之法度善惡者脩身之衡鑑汝等輔導諸子
必申其德義明其善惡使之趨正而不流於邪如此則
能盡輔導之職觀之梓匠雖有材木必加繩削乃能成
器太子諸王必得賢輔導因質贊助乃能成德職梓汝
等爲官僚各宜盡心又如經史中古人已行之事可爲
戒監者采摭其事編次成集朝夕覽觀以廣智識亦有

助於輔導羣臣。頓首受命而退復顧劉基等曰。朕觀古賢聖之君。雖治平之世。而不忘修省。誠以富貴易至於驕奢。驕奢必至於荒縱。未有荒縱而不顛覆者。故嘗戒太子諸王。以爲士不能正身脩德。則殃及身家。爲士苴然。况於爲君爲王者乎。基頓首對曰。陛下此言。萬世之福也。○上諭太子賓客王儀。太子諭德秦鏞。盧德明。張昌。曰。範金碧玉。所以成器。尊師重傳。所以成德。朕命等輔導太子。必先養其德性。使進於高明。於帝王之道。禮樂之教。及往古成敗之迹。民間稼穡之事。朝夕與之論說。日聞讜言。目無非僻之子。積久以化。異日爲政。自然合道。卿等勉之。

甲辰封孔希學爲衍聖公。孔希大爲曲阜知縣。皆世襲一
希學孔子五十六代孫也。命襲封衍聖公。仍置官屬曰
掌書。曰典籍。曰司樂。曰知印。曰奏差。曰書寫。各一人。又
立孔顏孟三氏教授司。教授學錄各一人。及立尼山洙
泗二書院。各設山長一人。復孔氏子孫及顏孟三家子
孫徭役官屬。並從衍聖公選舉。至省推用。授希學誥曰。
古之聖人。自羲農至于文武。法天治民。明並日月。德化
之盛。莫有加焉。然皆隨時制宜。代有因革。至于孔子。雖
不得其位。曾奉聖之道。而通之以垂教萬世。爲帝者師
其孫子。思又能傳述而名言之。以極其盛。有國家者。求
其統緒。尊其爵號。蓋所以崇德報功也。歷代以來。膺襲

封者或不能繩其祖武朕甚憫焉當臨御之初訪世襲者得五十六代孫孔希學大宗是紹爰行典禮以致褒崇爾其領襲世儒益展聖明之用於當時以副朕之至望豈不偉哉

癸丑徐達克趙州以叅隨王成守之○癸亥手詔召御史中丞劉基命以來春舉行籍田禮○甲子詔定乘輿以下冠服之制○十二月徐達克太原蒙古擴廓帖木兒遁之甘肅

初元主北奔命擴廓帖木兒復北平因是率兵出鴈門關將由保安州經居庸關以至北平達聞之謂諸將曰擴廓帖木兒率師遠出太原必虛北平孫都督總六衛

之師足以鎮禦。我與爾等乘其不備，直抵太原，猶若破竹。則彼進不得戰，退無所依。此兵法所謂批亢擣虛也。若彼還軍救太原，則已爲我牽制，進退失利，必成擒矣。諸將皆曰善。遂引兵徑進擴廓帖木兒至保安州聞之。果還軍，其鋒甚銳。副將軍常遇春謀於達曰：「我騎兵雖集，而步兵未至，不可與戰。莫若遣精兵夜襲其營。」其衆可亂，主將可縛也。達然之。會擴廓帖木兒部將豁鼻馬潛遣人約降，且請爲內應。達於是遣兵夜襲其營。擴廓帖木兒方燃燭坐帳中，使兩童子執書以侍。衆覺變擾，亂。擴廓帖木兒倉猝不知所出，亟納靴。未竟，跣一足，踰帳後出。乘驛馬從十八騎遁去。迨日，豁鼻馬遣其子來。

報達等勒兵進營太原城西。貉鼻馬以其將校降。得兵四萬人。馬四萬餘匹。擴廓帖木兒奔大同。遇春以兵追之。至忻州不及而還。擴廓帖木兒遂走甘肅。置額州衛。命指揮僉事李勝守之。

額州自元季韓咬兒作亂。民多逃亡。城野空虛。上自如。才道過其地。遂命勝築城立衛。招集流亡。民始復業。詔定官民喪服之制。

監察御史高原侃上言。京師人民猶習元氏舊俗。凡有喪葬。設宴會親友作樂娛尸。惟較酒飯厚薄。無哀戚之情。流俗之壞至此甚非所以爲治。且京師者。天下之本。萬民之所取則。一事非禮。則海內之人。轉相視。幼

勝言。况送終禮之大者。不可不謹。乞禁止以厚風俗。
上是其言。乃詔中書省令禮官定官民喪服之制。
定三師朝東宮儀。

上以東宮師傅皆勲舊大臣。嘗待以殊禮。朝賀東宮。難
同庶僚。故命禮官考古定議。

副將軍馮宗異等克綺氏擒蒙古右丞賈成。遂克平陽。擒
其右丞李茂。○副將軍馮宗異克絳州。擒蒙古左丞田保
徐伯昌。○起復濟南知府朱圭亮爲禮部尚書。○頒社稷壇
廟於天下郡邑。○詔立旌幡廟京師。於都督府治之後。天
下衛所公署後。以霜降日致祭。○遣符寶郎僕斯以即
皇帝位。號國太明。建元洪武。賜璽書高麗國王王顯知之。

遣知府易添奉詔以卽位號國大明建元洪武示安南
知之

江左陸翀之公校